

Sofonias

Ta duel mi, ma mi mester ta franko ku bo. Bo no tin salú. Morta ta inevitabel.” Sin duda e palabranan aki ta esnan mas diffisil pa un dòkter bisa su pashènt.

Den Tèstament Bieu Dios a instruí tres “dòkter” pa komuniká e mensahe aki.: Jeremias, Habakuk, Sofonias. E pashènt tabata un e nashon Juda. E enfermedat fatal tabata piká!

Riba su mes esaki ta tristu. Pero loke ta mas tristu—i mas frustrante—ta e echu ku tabatin remedi pa Juda su enfermedat—repentímentu genuino! Ma e pashènt a nenga koperá. El a preferá sigui su kaminda i muri na lugá di kura!

Jeremias tabata e profeta ku a yora, Habakuk e profeta ku a hasi orashon, i Sofonias e profeta ku a prediká. E trio aki ta mostra kon nos mester reashona pa ku piká: Yora pa piká, hasi orashon tokante piká i prediká kontra piká.

Dios a ofresé Su pueblo hopi lus i guia spiritual den e último añanan di eksistensia di nan pais. Ma nan rechaso di e klaridat ku Dios a duna nan, ta un kapítulo skur den nan historia. Sofonias tabata skirbí den e era ku e lus tabata paga na Juda.

I. OUTOR DI E BUKI

E profeta Habakuk a duna masha poko informashon tokante su persona...pa no bisa “nada”. En kontraste, Sofonias a duna mas informashon personal.

E nòmber Sofonias ta bin di su nòmber na idioma hebreo, SEPAN-YAH, ku ta nifiká “Jehová a skonde (e)” òf “esun ku Jehová a skonde”. Ta pusibel ku mayornan di Sofonias a usa e palabra skonde den e sintido di protekshon. Probablemente Sofonias a nase durante reinado di Manasés. Kisas Sofonias su mayornan a yam’é “Sofonias” ku gratitut ku Dios a skap’é di e matansa di Manases.

Sofonias ta e úniko profeta ku a lista su atepasadonan te e di kwater generashon (1:1). Nòmber di su tata tabata Kusi i su welo Gedalias. Bisa-welo di Sofonias tabata Amarias i nòmber di su bisa-bisa-welo tabata Ezekias.

Pakiko Sofonias a lista su antepasadonan te di kwater generashon? Pasobra ta parse ku e tabata ke pa su lektornan sa di Ezekias, kwater generashon anterior. Maske tin interogante tokante identidat di Ezekias, no tin motibu válido pa keda sin aseptá ku esaki tabata e Ezekias ku a sinta riba trono di Juda. Si esei ta e kaso, anto Sofonias ta e úniko profeta ku nos sa sigur ku e tabata di famia real. Pues, Sofonias tabata aktu primo di rei Josias. Ta notabel ku e buki di Sofonias ta indiká ku e tabatin mas konosementu ku korte di rei ku lo tabata e kaso pa mayoria hende (en kontraste di p.e. Mikeas).

Ezekias tabata un bon rei i a sigui Dios. El a reina (huntu ku su tata Akaz) ora Asiria a konkistá Israel...i a hera konkistá Juda. Ma su yu susesor, Manasés, tabata e rei di mas malbado di Juda. Manasés a re-introdusí idolatria i tur sorto di maldat ku su tata a destruí: inhustisia sosial, dekadensia moral, abuso i korupshon finansiero. El a persiguí esnan ku a biba pa Dios. Segun Talmud, un buki hudiu, Manasés asta a mata profeta Isaias dor di zag e na dos. I Manasés tabata sigui pa Amon, ku tampoko a sigui Dios. Ma el a reina dos aña so.

Josias, bisa-nieto di Ezekias, a kuminsá reina ku ocho aña (2 Krónikanan 34:1). Su reiando a dura 31 aña (640-609 B.C.). Beibel ta bisa ku “el a kuminsá buska e Dios di su tata David” ku 16 aña (2 Krónikanan 34:3). I ku binti aña (2 Krónikanan 34:3,8) Josias a inisiá seis aña di reformashon spiritual (628-622 B.C.).

Segun Sofonias 1:1, el a profetisá durante e bon reinado di Josias (640-609 B.C.). Si Sofonias tabata famia di rei Josias òf su konsehero spiritual, ta pusibel ku el a influensia Josias pa introdusí reformashon spiritual. I kisas Dios a usa e buki di Sofonias pa influensia Josias pa inisiá e reformashonnan aki i tabata e motornan tras di e reformashonnan aki.

Ma tin algu tristu tokante e reformashonnan di Josias. Di aparenzia e reformashon tabata impreshonante. Ma en realidat ta parse ku e reformashon no a yena e nesesidat bèrdadero. Habitantenan di Juda a mir’é mas bien un reformashon ku rei a spònser. Nan mes no a eksperensia revivamentu spiritual. Méskos ku algun kreyente awendia, e poblashon di Juda aparentemente no tabata sinsero pa ku Dios.

Sofonias no a laga sa unda su kas tabata lokalisá. Ma ta probabel ku el a biba na Jerusalèm. Sofonias sikiera tabata na Jerusalèm ora el a profetisá. Den 1:4 el a menshoná Jerusalèm i tambe a yam’é “e luga aki”. Ademas 1:10-11 ta indiká ku Sofonias tabatin bon konosementu di Jerusalèm. El a papia di e “Porta di Piská” (un entrada di stat parti nort), e “di dos Distrikto” (un bario den Jerusalèm) i “Maktes” (un otro bario den Jerusalèm situá den un vaye unda nan tabatin feria).

Jeremias, Nahum, Habakuk i Sofonias a profetisá durante e último añanan di eksistensia di Juda. Méskos ku Oseas i Amos a sklama pa Israel repentí promé ku ta lat, e kuater profeta aki tabatin e mésun ministerio na Juda. Nan a biba durante e mésun era i sin duda nan lo a konosé otro.

Sofonias a prediká ku kurashi. El a mira e situashon serio riba horizonte, tantu pa Juda komo pa otro nashonnan. E tabata sa ku kalamidat serio ta na kaminda. El a usa palabranan pa pinta un potrèt hopi skur pa lamta nan for di nan apatia i soño. “E dia ei ta un dia di furia, un dia di problema i angustia, un dia di destrukshon i desolashon, un dia di skuridat i tiniebela, un dia di nubia i skuridat profundo, un dia di tròmpe i gritu di bataya kontra e statnan fortifiká i e torennan haltu di skina” (1:15-16). I el a deklará esei ku frankesa, maske e bèrdat no tabata popular. Esei ta indikashon di un bèrdadero profeta di Dios.

II. LEKTORNAN DI E BUKI

No tin duda ku Sofonias a skirbi su buki pa pueblo di Juda...spesífikamente Jerusalèm (1:4) maske el a menshoná algun nashon pagano tambe.

III. FECHA DI E BUKI

Sofonias a duna diferente indikashon di e fecha ku el a skirbi su buki. Un indikashon kla ta haña den 2:13. Ei Sofonias a skirbi di e desolashon futuro di Nínive, loke a tuma lugá na aña 612 B.C. Un otro indikashon ta 1:1 unda Sofonias a laga sa ku el a profetisá durante reinado di Josias (640-609 B.C.). Pues, sigur por bisa ku e buki ta fechá entre 640 i 612 B.C.

Básikamente tin dos punto di bista pa un fecha mas spesífiko. Tur dos perspektiva ta basá riba contenido di e buki.

Pa di promé, algun ta haña ku tono di e buki ta duna impreshon kla ku Sofonias a skirbi su buki *promé* ku e reformashonnan di Josias a tuma lugá (2 Reinan 23; 2 Krónikanan 34) entre añanan 628 i 622 B.C. Nan ta di opinion ku Sofonias a deskribí kondishonnan moral i religioso manera nan tabata promé ku e reformashon (1:4-6,8,9,12; 3:1-3,7). I ta parse ku Josias a ataká e mesun pikánan (2 Reinan 23:4-7) ku Sofonias ta kondená (1:4-6).

Ma e di dos perspektiva ta ku Sofonias su mensahe tabata asina skèrpi tòg *durante* i *despues* di e reformashon, pasobra el a ripará ku e poplashon di Juda no a kambia di kurason, nan no a eksperensia revivamentu genuino. Esei por splika dikon Sofonias no a menshoná Josias su esfuersonan di reformashon.

Tur dos ta bon pusibilidad. Pues ta mas korekto pa keda ku e fecha di skirbimentu durante promé parti di reinado di Josias (640-628 B.C.).

IV. LEMA I PROPOSITO DI E BUKI

Por deskubrí lema di e buki dor di kompará e promé versíkulo di e buki (despues di introdukshon) ku e último versíkulo. “Lo Mi kita tur kos kompletamente” ta loke 1:2 ta bisa, mustrandu riba Dios Su huisio. En kontraste 3:20 ta muestra den direkshon di Dios Su bendishon ora e ta bisa, “Lo Mi duna boso fama i alabansa”. Lema di e buki ta: Juda lo mester pasa dor di huisio pa yega na bendishon! Dios lo preservá Su puebel durante e huisio binidero—i finalmente E lo bendishoná nan. E buki ta kuminsá ku kastigu i ta klousurá ku kantamentu.

Ligá huntu ku e lema ta e konsepto ku Señor ta meimei di nan. E ta meimei di Jerusalèm pa huzga (3:5) i E ta meimei di nan pa salba (3:15,17).

Nifikashon di Sofonias su nòmber (Jehová ta skonde) tambe ta kuadra bon ku e lema. Maske Dios Su huisio lo ta desastroso, tòg E lo skonde i protehá e restante di Su pueblo.

Pues e lema tin di hasi ku e echu ku Dios ta soberano! Dios ta kontrolá tur kos den Su mundu, apesar di aparenzia ku esei no ta e kaso, i E lo proba esei pronto dor di e kastigu teribel ku Juda lo eksperensia i e destrukshon kompleto di nashonnan pagano idolatro. Juda por evitá e rabia di Dios solamente dor di repentí.

Ta méskos awendia. Tin ora ta parse ku Dios a pèrdè kontrol di mundu. Hende malu ta prosperá mientras bon hende ta sufri. Ma no lubidá ku Dios ta reina i ta soberano!

E buki di Sofonias ta enfatisá tantu Dios Su rabia (1:15; 3:8) komo Dios Su amor (3:17).

Ku e lema ei, kiko ta Sofonias su propositonan pa skirbi e buki?

A. SOFONIAS A SKRIBI PA JUDA REPENTÍ I EVITÁ DIOS SU KASTIGU TERÍBEL

Repentimentu ta e mésun meta di tur profeta...loke nos a mira hopi biaha ya kaba. Sofonias no a spesifiká kon e kastigu di Dios lo pa Juda lo ta.

B. SOFONIAS A SKIRBI PA SPIERTA JUDA KU “DIA DI SEÑOR” TA BIN

Sofonias a usa e palabranan “e dia di Señor” shete biaha den su buki kòrtiku (1:7,8,14,14,18; 2:2,3). (Ademas Sofonias a referí na e mésun dia ku otro palabranan – 1:9,10,15,18; 2:2²,3; 3:8,11,16.) Nos ta kòrda ku “e dia di Señor” por ta usá den diferente sintido. Pa di promé, e por ta usa den un sintido eskatológiko. Esaki ta indiká e tempu futuro ku Dios lo huzga e malbado i bendishoná e hustu (enserando e Tribulashon, di dos binida di Kristo, i Mileño, èts.). E di dos manera ku e palabranan aki ta usá ta den un sintido históriko. Por tin un evento ku por parse e gran dia di Señor binidero. Por ehèmpel, Sofonias a profetisá un dia di Señor ku lo bin pronto pa Juda i Jerusalèm ku ta inevitabel (1:4-13) pa motibu di Juda su piká—degenerashon religioso, korupshon i inhustisia. El a referí na tempu ku Babilonia lo konkistá Juda. Esei ta solamente un sombra di e gran “dia di Señor”.

Nos a mira ya kaba ku Abdias i Joel tabata e promé profetanen-eskritoren ku a usa e ekspreshon aki. Sofonias simpelmente ta bolbe tres’é na nos atenshon.

V. STRUKTURA I KONTENIDO DI E BUKI

Por tin diferente skema pa e buki. En general por bisa ku 1:1-3:8 ta trata ku huisio i 3:9-20 ta deskribí restorashon. Ma nos lo usa e siguiente skema i duna algun komentarionan:

I. DIOS SU HUSIO KONTRA JUDA - 1:1-2:3

A. E Motibunan pa Su Huisio - 1:1-6

Probablemente 1:2-3 no ta referí na Dios Su huisio *final*! Ma e ta deskribí kon nos mester biba en bista di e echu ku Dios Su huisio ta bin, bidanan santu. E dos versíkulo aki ta rekordá nos di 2 Pedro 3:10-14.

B. E Proksimidat di Su Huisio - 1:7

C. E Resipientenan di Su Huisio - 1:8-13

1. E famia real - 1:8
2. E saserdotenan - 1:9
3. Henter poblashon di Jerusalèm - 1:10
4. E komersiantenan - 1:11
5. Esnan spiritualmente indiferente - 1:12-13

E palabranan den 1:12, “SEÑOR lo no hasi ni bon ni malu” por bruha nos. E hendenan indiferente pa ku Dios a kere ku Dios no ta mira ni sa kiko ta pasa i komo resultado, E lo ni huzga ni bendishoná. Nan aktitut tabata “Si Dios ta eksistí mes, no ta importE kon mi ta biba—mi por hasi loke mi ke!” Ma Sofonias sa ku Dios Su kastigu ta serka.

D. E Proksimidat i e Horor di e Dia di Señor - 1:14-18

Sofonias ta pinta un portret hopi skur i severo pa impreshoná su paisanonan ku e seriedat di Dios Su huisio. Kasi por bisa ku Sofonias a purba spanta nan, pa spierta nan for di nan soño spiritual i repentí.

E. E Yamada pa Repentí - 2:1-3

Sofonias a roga Juda pa repentí i evita Dios Su kastigu teribel. Ma ta parse ku e sa ku esei lo no sosodé. P’esei el a dirigí su yamada pa repentí mas tantu na e pokonan ku ta reseptivo pa Palabra di Dios, pa nan bira na Señor i forma parti di e restante ku lo regresá na Juda despues di nan kastigu i gosa e bendishonnan di e reino.

II. DIOS SU HUISIO KONTRA OTRO NASHONNAN - 2:4-3:8

A. Dios Su Huisio Kontra e Nashonnan Pagano - 2:4-15

Den e sekshon aki, Sofonias a konsentrá riba otro nashon: Filistia, Moab, Amon, Etiopia i Asiria. Ku eksepsion di Amos, Sofonias ta e úniko profeta menor ku a profetisá kontra nashonnan pagano. Sofonias a usa e nashonnan aki komo ehèmpelnan di Dios Su intenshon di huzga tur nashon.

B. Dios Su Huisio Kontra Jerusalèm 3:1-8

Ma despues di kondená nashonnan pagano, el a bolbe dirigí su atenshon na Juda. Hasiendo esaki Sofonias a komuniká, “Si Dios ta huzga nashonnan pagano, sin duda E lo kastigá Jerusalèm ku ta muchu mas privilegiá.” I Sofonias a lista algun motibu ku Dios lo kastigá nan...pa motibu di nan inmoralidat, kapricho, lídernan immoral, hende sin ekskusa i persistensia den maldat.

III. DIOS SU HUISIO KITÁ I SU REINO ESTABLESÉ - 3:9-20

Anto Sofonias a kita su bista for di Dios Su huisio di Juda i otro nashonnan i a pasa pa deskribí e futuro un tempu di bendishon despues di kastigu. Reino di e Mesias lo enserá tur nashon, ku Israel sentral.

- A. E Destrukshon di e Oposishon Pagano - 3:8
- B. E Restante Purifiká - 3:9-13
- C. E Reino Bendishoná - 3:14-20

Sofonias a profetisá e destrukshon di Jerusalèm dor di Babilonia i e puebel di Juda deportá. Esei a sosodé na añanan 587-586 B.C., kuarenta pa sinkuenta aña despues ku el a profetisá. Tambe el a laga sa ku puebel di Juda lo por regresá na nan mes tera (3:10). Esei tabata un profesia di un evento ku lo sosodé mas òf ménos shen aña despues di e profesia, na aña 536 B.C. I Sofonias tambe a profetisá di eventonan ku no a sosodé ainda!

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 362-363.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 216-224.
- Benware, Paul N., *Survey of the Old Testament* (Chicago; Moody Press, 1988), p. 206-208..
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 117-118.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 406-409.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 441-447.
- McGee, J. Vernon, *Thru the Bible* notes, p. 300-301.
- Mears, Henrietta C., *What the Bible is All About* (Minneapolis: World Wide Publications, 1966), p. 321-324.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 121-124.
- Wood, Leon J., *The Prophets of Israel* (Grand Rapids: Baker Book House, 1979), p. 320-322.